

LA STORIE DAL GRANT GORILE E DA LA SURÎS

**E jere une volte  
une mari surîs  
che e faseve  
lis acrobaziis**

**par cirî  
il so surisin  
colât jù  
dal materassin  
e pierdût  
cence sperance:**

**“Joi, joi!  
Ce mâl di panze!”**

**E va sù  
su la montagne  
e cuant che e cole jù  
e frigne.**

**E va in cercje  
dal so piçul animâl  
fin ta la foreste pluviâl.**

**Lis simiis  
sot la ombrene  
no judin  
la surîs in pene.**



**Al rive un gorile  
a tîr di sclope:**

**“Aiût!  
Mi cjape,  
mi mangje,  
mi cope!”**

**La surîs e scjampe  
in Cine  
cjaminant  
di sere a matine.**

**Il pande  
cuintri il gorile  
nol sa ce fâ**

**e nol è pront  
par barufâ.**

**In Americhe  
parsore dai palaçs  
il gorile al sbasse  
i braçs.**

**La mame surîs  
di corse si tapone  
daûr di un sghirat.  
Ce ideone!**



**In Australie  
e cjate un koale**



**che al mangje simpri!  
Nol cjante e nol bale!**

**E rive a Codroip,  
e cjate dôs muiniis,  
une âf e un cai:**



**“Nol è chi il to piçul!  
Tu as di vê  
une pazience che mai!”**

**A timp di record  
e rive a Nord.  
Nol è un segret**



**e ta la nêf  
e devente un cubet!**

**Il gorile neri  
e forsit rabiât  
al vose: “Stop!”**

**e al berle, al berle**

**ni pôc ni trop!**



**Je e pense  
di jessi copade  
e e fâs une derapade.**



**Però no rive  
a scjampâ**

**e il gorile  
le puès cjapâ.**

**Il gorile al domande:  
“Parcè sêstu  
scjampade?”**

**“O vevi pôre  
di jessi mangjade!”**

**E il gorile,  
cu la muse buine:  
“Cjare surîs,  
o soi di corse di vuê di  
matine!**

**O soi grant e grues,  
ma no soi un sassin!**

**Ti ai puartât  
il to picinin!”**

